

ZION THUSUAK



REVIVAL CHURCH OF GOD (RCG)

Vol. XXVI

July - August 2022

No. 134



THUPI:

“Nite hi aphant ta’k lo ziakin la hun uh mangpha ta un”

Ephesate 4: 16

Editor: Rev. Dr. Khupkam Vaiphei

ZION THUSUAK

Editor:

Rev. Dr. Khupkam Vaiphei

Associate Editors

1. Rev. Liante
2. Rev. Ngulneipau

Contributing Editors:

1. Mr. Kh. Sang Vaiphei
2. Rev. Kailum

Board Members:

1. Upa Mangkam
2. Pro Pastor Lianboi

NOTICE

Zion Thusuak article zosia hi thugin lam thu ah editorial board ten maw pawkna akinei puan, article hun piate mawpuakna ah kawi ahi ziakin dawtnawp a um chun, amau dawtzawk dingin ka hun genchian uh a hi.

By: Editorial board ZT

A SUNGAH THU UM TE

	<u>Page No.</u>
1. Editorial	01
2. Hun chiasa kokit thei hile	02 – 05
3. Hukdam chate kinepna	05 – 10
4. Chate Missionary huang ah	10 – 12
5. Kum 1964 lai ah Langmaiching khua Thagau nasepna	13 – 24
6. Khanglaite Zangaina Camp Report	24 – 25
7. Hilltown VBS Report	25
8. RYF Solfa Camp Report	25 – 26
9. Pauchapna Hiatding	26 – 27
10. Hetsakna	27
11. Zion Thusuak Magazine Agent List	28

Editorial... ✍



Zion Thusuaq simtute zosia amasan Lalpa Jesu min in chibai

Lalpa'n damna ei piau va thani dan ah kisua sek Zion Thusuaq July-August 2022 tha ah suakit thei in I um ziakun eipuitu Pa Pathian chu pak in umta hen. Eimau in ala kihesek lo male Lalpa'n vang ei hemil puai ti mu leh het ahi. Tuchung issue hi damlona te ziaakin akivaigei kit ta, ZT latute zosian Leila ngaithiam diu ka hun dawn hi. Chun, thani dan ah kisua hisek maleh articles ding hi member te lak a pat hun kipia hi ata sam ma ma in khawk akisan ahi, I umna mun chiat un I pauchapnau in hezing hitiu in, Zion Thusuaq in atup leh dawite supiting zo thei zing in lalpa'n Zion Thusuaq hi hun malsawm ta hen.

Nausen piangtil ten nawitui adu in dutak in a chep ua ataksau in ahun khanpi in ahung pitin thei gual un, nang unle Pathian thu du inla, hukdamna tingkhawp ah la hun khan theine dingun nisin ah zingkal nitak in nezing unla, Bible simzing ta un, tichun, Pathian in hun malsawm ngei nei ding ahi.

Mi kua hile Bible leh chanchin thak kizikte sim thanuam ah lunglutna neithe chu Thagau lam in malzawlna adawng thei un akhawsakna lam inle abuai ngai puau hi ti mu ahiu. Lekha simthei ten sim lam hi lunglutna nei thei chiat leu hin, i thagau lam hinna lampi chialai inle haksa sa leh buaina tuak um ngai lo ding ahi. I thagau lam hinna lampi ah eipuitu chu imit ah imu leh I hette hi ahi. Ziak a chun lamit ah Pathian thu bep la et ah la sim zing chun Thagau lam hinna ann nezing mi chu hiding la hi, mi kuama annelo hing um ngai ngai lo a hi gual in Thagau lam khanto theina dingin chanchin thak sim leh Bible simte hi kithada lo ah Pathian apat malsawmna thak thak dawngthei dingin Lalpa'n hun malsawm ta hen.

HUN CHIASA KOKIT THEI HILE

By: Rev.Dr.Khupkam Vaiphei

“Nite hi aphant taklo ziakin la hun uh mangpha ta un. Zia ziaka chun, ngawl huai tak in um ki unla, Lalpa lunglam hawl in hiat thiam gawzing ta un”. Ephesate 5: 15-16

Sawlchak Paul in Ephesa mite kiangin, nite hi aphant taklo ziakin la hun uh mangpha ta un ati hi, hawi deu in isui chun, hunmat thiamlo ziak leh mat phat lo ziakin kisik ah hun chiasa ko kit nuam ten ten hi mi atam hi ti hi nang leh kei inle ila nei khak sek ahi ti aki chian ahi. Chuti ahi ziakin, tuhun hi hun kipak um hukdamna ni chu ahi ti hiat thiam ten a ngai ta ahi. (2 Kor 6:2) Hun chiasa kokit nuam te hi ahun lai ah hun mat thiamlo te, chuleh, setan in ala pui ah khaw helo ah ahun tamzaw ala mangdawk te ahi diak sek un ahi. Damlo ah lupna chung a kizam la hilo nak chun hawi deu in ki ngaitua thak le chun pha ahi, damlo in lupna chung a hung kizam ta le chun, kidam henlang, zia kha kibawl henlang, Pathian na sep thei dan dan in kistem pan ta le kati tina hun le hung umthei ahi ti he dawk thak le chun, a ziak chu, damlo ah lupna ngak ten alungthim ua agel masak pen u chu, kithi le bang ka chang diam, van gam ka lutna diam, ahilo le gawtmun ka lut kha diam ti thu hi akilang masa pen ahi nuam hi kenle lunggelnan ka la nei te khat ahi unaute. Mihiam khat in atunna ding leh a chan ding apha a sia ahet daw lo chun ama chu mingawl te khawsak gual in khawsa hi ding ahi, zia ziak a chun ngawl huai tak in um ki unla, Lalpa lunglam hawl in hiat thiam gawzing ta un ati ahi Paul in Ephesa mite kiangin. Ephesa mun leh gam hi sumkawlvei te kiveina mun nuam sum leh pai hawl na le nuam mun center khat ahi ziak in asungah umte khan Pathian hing hepha lo in khawvel nawpna sukpitin ding guatna in ataksau ah thil sual bawl khak dingle launa chang hepha lo in a um ua, tichun zia hun lai a khan dangka sunthiam Demetria kiti khat hin Diana lim a siam ah, alawkpai ma ma jiangin, hiti chun pathian imte siam in

Pathian hing him him mudawklo in ala um ziakun Paul in akiangun ngawl huai tak in um kiu in ti in lekha ala thawt ahi.

Ephesa mite gual ah tulai hun ah mite le I umkhaknau a um in, sumkawlveinalam inle anuam deu deu in, adiak in Lamka area vang vang commercial center ma chu ahung suak ta ahi. Zia gual mun leh hun te ahung tun ta'k zia kin Pathian lunglam hawl ah khawsak ding hung haksa deu deu ding ahi taw kitawn in Pathian mi tak tak hung hi a ngai in, a hilo chun, ziagual hun leh mi lak in kivendawna him him hi hung haksa ding ahi. Zingni tichu thizaw nile la tuak ding leh la chan ding te taw tu ah la um dan te enkai inlang kisukdik ding hun gaw ham ham in aw. **Jeremia 8:20** na chun hiti hin agen ah, **“Bu lak hun aliamta, nipi aki chaite, ei uh la hukdam ihi puau ah”** tin agente ivak sim daw chun, ziagual kampau hi khatveite chu Pathian neilo ten ahun gen khak ngei diu ahi. Dan le jia gen ahin nangle la pan lo na ding in tuhun hi kingaitua hun leh kisiam thak hun ahi. A um zia hi, Revival hun la aliamta, Camp leh Crusad hun la aki chaite, ei uhla hukdam in I um ta puau ah tina ahi, ivak sim thaw le chu bangma a hi pua, amabo chu zia hun hi chang ta le chun bang gual in la um diam ti he daw thei tanla.

Hun chiasa kokit thei hile chu awlmaw na ding umlo ahia, ahinla hun chiasa kokitthei lo ding ahi zia kin tu ah la hun hi aman tam ahi, mawk mual liamsak mai mai ziang ding hun gua kin kati ahi. Nikhat le Bible bung khat bek, ahilo le chang khat changni bek simdaw tei hun gua in, nikhat annelo in umle chun bang lati diam, ziagual a chun thagau lam hinna lam inle Pathian thu nikhat lasimlo ah la nek lo chun nicheng in hun kiam deu deu in la tin, hatdaw malak sang in thagau damlona nei in atawple taksa'n thina atuak gual in Thagau in thimai ding la hi. Thagau ah thi kiti hi lataksa dam in hat ma le chun le Thagau ah thita ti umthei ahi ti hemil kin aw. Thagau lam ah thita te chun chu athilam uh kihetlo ahui ahi, a zia chu lal Sual khale Pathian in a Lalna alak daw piak nung inle Lal in aki kawi nalai ah, Alalna Pathian in alakdaw kha

hele kisik in Pathian kiangin gitlo thupha chawi intin, ahilo le Pathian lung hawlina in a umdan kha napha sepdaw gaw ding ahi, zia malak sang a chun David chungin a eng sia tha ding avak gaw nalai ah, Lalpa'n atawp in athatta ahi kha, ama bep hilo in a cha pathum Jonathan zaunan athi khawm tau ahi. Pathian in kuama zabawl chuam anei puai tihile het a ngai hi. A ziak chu lal Sual chungu Pathian lung natna kha ahile, agalte khatcha le hawilo ah, agancha teu tiangin atha ding ti ahia, amabo aman Gancha thau tak tak leh Alalpau Agag nasan kha thatlo ah kilawm tak ah Maicham ah halmangthil lat ah lat ding ti haw ala hi ahi, lak khat in I gel le Lal Sual in agelkha le chu kilawm tho ahi, Pathian lung hawlina ah Gancha thau tak tak te haw kha Halmangthil lat in Pathian kiang in kilan le ti ahi, mihiam ngai dan in chu dikmaw diaklo ahi, ahinla, Pathian in zia kha adawi ahi pua, ama ngei in amelma te kha atha suak ding ti thupiak ala hin ahi, maleh aman jia thupiak kha ngai lo in ahung um tak zia kin thina atuak uh ahi. Tun le Lalpa'n ei haw kiangin thu eigen um ahi, zia chu, **Mathai 22: 37-40** sunga jiagual hin mu ahi, **“Lalpa la Pathian chu la lungchang zosia leh, la hinna thagau zosia leh, la lungthim ngaituana zosia ah la hepi ding a hi. Zia hi thupiak laka a masa pen leh a lopi pen chu ahi. Chun, apani na hi ah ka hiat chu, Nang la kihepi gual in la invengte le la hepi ding a hi, ti hi ahia. Zia thupiak panite ah hin dan zosia leh zawlneite thugen haw zosia kha a ki khai khawm a hi, atia.”** Chuleh hepi Johan inle hiti hin eiti ahi, **“Khawvel hi ngaina ki un la, khawvel ah thil umte hile ngaina diak ki un, kua'nle khawvel hi a ngainat chun, Pa hepina chu ama ah a um puai, khawvel ah thil um, taksa hukna te, mit nawpnate, hinna kisaktheina te, ziate zosia hi Pa ah kipat ahi pua, khawvel ah um ahi zawu. Khawvel hi a sungah um nawpnate hi taw mangthai khawm zing ahia, himaleh, Pathian lunglam hitute vang chu kumtuang ah umzing ding ahi.”** Ati ahi. 1 Johan 2: 15-17.

Ziatak ah Jesu thupiak thak te hi zui ah zawp ding ti na a hi, La lungchang zosia, la hinna thagau zosia leh la lungthim ngaituana zosia

(Spirit, Soul and Body) Lungchang, lungthim ngaituana leh taksa pumpi ah Pathian ngainat ding hepi ding akitina hin, Pathian lunglam ah hinna leh khawsak dan bangkim ah bukim tak in um ding, thiantho ding tina ahi mai hi. Tun le numei pawsal kilung sia leh kihepi tak takte khun alungthim natna dinguh kibawl piak ngai ngai lo ahiu in ahi. Khat inle khat inle lungthim kihawl tua in kihepi tak in a cheng khawm thei bep uh ahin ahi. Ziagual a chun Khrista hepina la nei chun Lalpa kipakna ah um zing thei in la tin, chuleh la hun mat dan te chungin kisikna ding leh, hun chiasa kokit hithei le ti in lung gel nei ta puan latin, malam kipakna ngen in um zaw ta ding a hi tai. Tununga bangtik hun inle hun chiasa chungu kisikna neilo dingah tu ah pat in Lalpa lunglam hawl in hindan dik ah hing ah kochuam leh mipite phatchuamna ding leh mangthai tampi hukdawk thei ding in Lalpa'athu igen teu hi hun malsawm ta hen. Amen.

HUKDAM CHATE KINEP NA

By: GL Muana Neitham

Zia Leisiat , i khawsaknau khawvel, i khualzinna gam ahin vang haksatna, nat leh sat, gentheina leh buaina chuam chuam I maitua zing sek hi. It leh ngaite tawh hunlo phatlo a kikhenna gam ahi. Hansia law sa, bukimlona leisiat mun a khawsa nalai Lalpa ading a mithiangthote, gingtu te ding in le thamuanna tak tak zia khawvel ahin a um diak puai. Buaina,haksatna leh nat leh sat in le gingtute akhen diak puai.

Hinla Kinepna hing nei te,gingtute ading in vang, khawvel khualzinna lampi zawt lai ahin Khrista zal in bangkim in thuakdan, paldan leh maitua dan a thiam un ahi.

Lalpa Jesu Nungzuite chu Khawvel a khawsa zing leh khawvel a um nalai ahinla khawvel a hitalo, chunglam thil zing a khawsa, THAWKITNA NI LOPI TAK ngak te chu ahiu hi Lalpa Jesu Khrista chu ami thiangthote puiding ah ahung phat tak chuleh mithi hukdam chate chu than akipat in tho tan tin uh, ahing a dam nalaite chule lak to hita ding ahi. Zia ni chu ahi hukdam chate KINEPNA thupi pen chu

Damlo, liangvaite, mitthum leh piangsual ti umta puan tin. Khawvel Doctor ten a damsak zawlo damlona umta puantin. It leh ngai khensa te ngai a mitthi thiakna um tapuan a zia nitak chule!

Zia Ni LOPITAK CHU ngak leh thil zing kawm in, gingtute chun zia leisiat gim gentheina mun ahin Pathian lopi nading in ma a sawn zel in, Pathian siam Zion gamthak chu a zuan zing un ahi

Zawlnei Elisha chanchin kha vai ngaitua thak hitiu aw. Zawlnei Elisha kha Zawlnei ELIJAH sang in thil hitheina ale nih in anei hi. Zawlnei ELIJAH Thagau chan le nih ala dawn hi. Thilmak(Miracles) tamtak a bawl thei ahi. Thilmak bawlthei pa tidan in aki gen hial ahi. (2 Lengte Bung 2na)

1na. Elisha mangchan Pathian in Maob gamkeu achun Israel sepaite leh a ganchate dawn ding tui lamdang takin a pawtsak/a pia ahi.(2 Lengte 3:17-18)

2na. Meithai chaga nu ading in THAU tamtak lamdang takin a pawtsak/ luangdaw sak ahi. (2 Lengte Bung 4)

3na. Shunammite nupi chapa neilo lamdang takin chapa a neisak hi. (2 Lengte bung 4na)

4na. Mithi lamdang takin a kaitho kit hi. (2 Lengte 4na)

5na. Naaman Phak a damsak hi. (2 Lengte Bung 5)

Zia achung a kigen panga tilo adang le a um hi. Pathian in Zawlnei Elisha mangchan thilmak tak tak, thil lamdang tampi a bawl hi. Elisha

bawlthei ziaq hilo in,Elisha Power le ahi adiak puan, ama a thunei, aneitu Pathian thilmak bawl ahi zawi. Elisha hi leisiat mihiam khat nang leh kei gual ahi. Pathian matchak thei ding a um ahi ziaq in,Pathian in Elisha chu mangchan thilmak lamdang tampitak a bawl hi. Pathian thupiak zui dik chu Elisha ading a phapen chu ahi. Hinla Hun a hung liam tozel a, ELISHA chu damlona ziaq in THI ding dinmun in a um ta ahi. (2 Lengte 13: 14 apat in)

Zia gual a Pathian mi mama, Pathian za leh Pathian in a matchak mama zawlnei Elisha chu damlona ziaq a thiding leh damlona ziaq a zalkhun ngak mai ah a um chu mitam tak ngaidan in vang lamdang leh thil hithei ding a kilom lo ahi.

Thilmak leh thil lamdang tamtak bawlsek , damlo tamtak te sudam thei, mithisa natiang le kaitho a hinsak kit thei pa Elisha chu damlona ziaq a thiding dinmun a h um chu thil hithei guallo abat na a um hi. Lengpa Joash inle ava ve hial ahi.

Pathian thu awina, Pathian nasepna leh KHRISTIAN hina hi nawpsakna ding, kipakna ding, hausakna ding, thilmak bawl thei na ding,hisel tak a umna ding BEP hilo ahidan akilang hi

Zia khawvel ahin damlo ding, na ding-sa ding, lungai gentheina tuak ding, sukgentheina maitua ding,haksatna chi chuan chuam tuak ding him a bawl Khristian te chu ihu hi. Zia gual haksatna chu thuak ding in LALPAN ei phal ahi. Khristian hi ziaq a nawpsak ding, kipak a hausak ding, damthei ding tina ahi puai. Zia leisiat khawvel a cheng a khawsa nalai te chun leisiat damlona, haksakna te atuak ding him uh ahi. Hinla Gingtute ading achun zia lei taksa THINA hi bangkim bei le atawpna ahi puan kumtuang hinna kipatna chu ahi zawi.

Banggual haksatna, damlona leh lungngaina tuak zing maleu a kinepnau, athil chimlo uh chu chung van khawpi tun kal ahin, zia van

khawpi achun a hukdampa JESU KHRISTA mel mu kal ngakla takin THAWKITNA NILOPI chu athil zing un ahi

Zawlnei Elisha chu phunchiaklo hial in, nathei damlothei zia lei taksa hi mangthai ziangthei ahi lam ahe chian mama in ahi. Pathian in sathau a nu, thilmak bawl theina lopitak a piak haw le khawvel nat leh sat in pel diak loin, a khenchuam diaklo ahi. Pathian Chapa Jesu Khrista ngei le liangvai, genthei leh thuakgimna chitin thuak in zia lei a len lai khan ala khawsa khala maw? Bep loin nang leh kei ading in Kraws in tatna nasep in, a hinna ala pe tai!

Khristian te nasepman leh lawman chu lei a muding ahipuan, Pa Pathian in Van a ei kawi he piak ahi zawi. Lei a lawman muding kinepna in Jesu zuina lampi nawngkaina ei tut sek hi. Jesu nungzuina leh Pathian thilte hi lei go khawvel thilte ei puai ti hetzing ding ahi. Leisiat a chethei, nuamsa leh lawting tak a kilang haw hi lei go, amangthai thei nawp tel ahi mai ui. Van lawman ding vang lungkham um, gen hak mama ahi.

Mihiam ngaituana leh pilna in vang Pathian lampi leh a vaihawm dante hi ngaitua ah hetzaw ding gual ahipuai. Ei dawih leh ei lampi te vang Pathian a tawh ki millo, kibanglo chu ahi.

Jesu nungzuitu Gingtua masate, Apostle te haw thidan, haksatna thuak dan, sukgenthei ahidan uh kha vak ngaitua thak kit hitiu leu hin. Jesu Nungzuina hi; Khristian hina hi nuam leh kipak tak a hinkhua mat a, hausa leh chethei tak a um a, thuakgimna bangma maitualo a, natna thuaklo kei a THI a vangam lua ding a kinepna chu kinepna DIKLO ahi.

Bible zilsakna ngaisak keilo in khenkhat chun, mi nuamsa deu, mi hausa deu te amu phat ua leh khangto sa in, amau khu/ ziate khu mipha, Pathian he ahiu in, malsawmna dawng ahiu ti gen ching i tam mamau hi. Leisiat a genthei leh chaga haw khu Pathian et a bang gual

in a hausa diam uh ti ngaitua ngai ahi! Chaga gentheite khu Pathian hansia law ahi chuam puai ti hetzing ding ahi. Pathian Lalgam chu nek le don ,nei le go leh hau le jong a kinga ahi puai!

Zawlnei Elisha kha damlona ziak a, genthei tak a thi ziang ding in vang mihiam ngaituanan in vang ahi theipuai. Zia bang a Pathian matchak leh thil lopi tak bawlthei pa kha maw....Ahin Elisha chun ana asep, azui leh a Pathian chu ahechian mama hi. Lei thil leh vanthil te a hechian mama hi....

Hinla HUKDAM CHATE KINEPNA chu zia leisiat khawvel ah hilo in LALPA JESU KHRISTA zal a THAWKITNA NILOPI chu ahi zawi!

Keima min zia kin mi zosia muda hi'n lau; himaleh, a tawp tiang ah thuakzote chu hukhin in um in au
MARKA 13:13

Ahi'n, Genpiakpa, Thagau Thiangtho ngei chu ka min in, Pa'n hun sawl intin, ama chun thil bangkim hun hil intin, la kiang ua ka thugen zosia hi hun hetdawsak kit ding ahi. Thamuanna ka nutsia piak la hui; keima thamuanna ngei chu ka hun piak la hui; khawvel in a hun piak gual in ka hun pia puai. La lungthim uh lungkham ki'hen la, lau le lau diak ki'hen. La kiang ua, chia mang ing ka tin, hung kit ding ka hi, ka ti kha la he tau hi. Keima lei hepiu leh, pa kiang ah chia ding ka hi, ka ti ziak ah hin kipak ma ma ding la hui; ka pa chu keima sang ah lopi zaw ahi ziak in. JOHAN 14:26-28

Ziazia chun, chiau inla, namtin lak ah mi nungzui in siam unla, Pa leh Chapa leh Thagau Thiangtho min in baptis un; la kiang ua thu ka piak zosia hi jawm ding in zilsak un. Kumkhua'n, khawveltawp tiang in la kiang un um zing ding ka hi ti hezing un," a tia. MATTHAI 28:19-20

Mi tam tak in Khrista kros chu kãl in hinkhua a mang un; a chanchin uh ka hung hilsek kha, tu'hin le mitthi pawt kawm in ka hun hil kit la hiu. Zia mite tawpna ding chu manthaina ahi'n, a pathian uh chu a gilpiu ahi; a kilopisaknau chu a mualphonau ahi; a lungthim un lei thilte a koi ui. Himaleh, eihaw I khawsaknau chu van ahi; zia ah kipat chun Lalpa Jesu Khrista, Hukdampa chu I ngak ui. Ama chun bangkim a thunuai ah a umsak thei ziakin, I taksau musit um tak hile ama taksa lopi gual hiding in hun siam danglam in a. PHILIPPI 3:18-21.

CHATE MISSIONARY HUANG AH

By:- Manggoulian Vaiphei, Mualkonbung

Tuni zion thusuaq ading in jia article hi jik thei ding ah damna ei pia phat pha ei pia lalpa I Pathian uh chu chawi hawi na le lopina jouse kapia masa ahi.

Nu leh pate ho lalpan mawpuak na lian tak eipiak uh chu Pathian apat kipakman idon maljawlna chate alal gam ading etkol hi ahi. Thupilte 22:6 Naupang te chu lam dik hil lechin, ahung upat tiang unle petmang ta pua'n au, Nu leh pa te ho tuni i Chateu i atkol danteu hi i ngaitua chun ni dang lai sang in akhangto in akilang ah maleh jia bep ahin lung awi jiang lou in thei tawp sua in eimau christian hindan tawh kituak in Missionary nasep lam a lung lut sak ding hi apawi maw khat chu ahi. Nu leh paten ngaikhawk tak ah I chateu aneo lai apat in Pathian lalgam ading in ijil til chun bible ah imu gual in lamdang petmang loin Pathian thu hun jui thei bep ding ahiu. Missionary nasep a chate lunglut sak ding ti hi field ah va chia khel khel di tina ahipoi thagau mangthai lainat na ahun nei thei na diu ahi. Ahung pitin ua field ah Missionary nasep nopna ahun nei ua ahi leh apha diak chu ahi.

Naupang neucha cha te missionary thu ihil ah bang ma aphant chuam na um puan na tin ngai nep lo in gamthim umdan christa nei apawi maw dante aneu ua pat hil angai ahi ajiak chu naupang te hi tungman toh tekak ahia tungman chu anem pet a lim idawi dawi isiam dawk thei a maleh tungman a atak phat le vang bang ma siam thei na hita lo ahi. Jia gual ma chun naupang te le aneo ua pat ijil til na lam leh ijil til dan dan in achia sek uh ahi. Eimau gam ah christian khat le umnailo masang te thillawk a pan ilak diu iki dawi sak ua, chate chu thil piak na lam pauchap na lam, eimau gitlo jiaka Jesu christa ahung kipiak dok dan te ginglote dinmun te bang Jesu christan chanchinpha gen jak ding ah ei sol dan te lalpa thu awi lo te chan ding te Pathian thu jui hi malsawm na ahi dante i jil til ah Pathian nasep apawi maw dan te i hil diu angai ah ajiak chu tulai ah Pathian mi mat minthang ma ma te leh Missionary te lak ah tamtak te hi aneu lai ua anu ahem apa ahem in ala jil til jiaak ua gamthim veinatna ala nei tate ngen ahiu chu. Jia te lak a chun Billy graham le khat ahi. A thu genna khat achun ka khawvel hin khua ah ei tilkho pen le ka etton pen chu kanu ahi ala tia chuleh Pathian mite sepna leh kikumna jal lin gawtmun lampi le aki khak thei hi tin le agen ahi. Aumjia chu nu leh pa ten ahun lai ah achateu Missionary huang ah puilut a um te chun gamthim ading in hung ki pia dawkin lalpa nasepna ah ahung kimat chak uh chun gotmun lam juanta lo ahiu, chate jalla chun thagau mangthai mi bangjat ahem gawtmun zuandi lai le azuan lo thei uh ahi tina ahi. Nang leh ken thagau mangthai te hukdok na ding in bang ti gual in pan ilau vem maw ? Thagau mang thai te a ding in ihi piak thei bangma aum ta pua pauchap piak na leh thil neucha cha ipiak bep ti lo in bang ma ibol thei umta lo ahi jiaak ah ka cha te bek hin thagau mangthai khat bek ahuk dawh thei le tin ichateu haw hi gamthim ading in Missionary huang a puilut ngai hilo ahem ?

Tunung ah chanchin pha gen jak tu ding I insung I kochuam sung leh imission sung ah aumtheina ding a chun nu leh pa ten i chateu Missionary huang ah i pui lut lo uachun chanchinpha gen jak tu ding

neilo in Missionary di hung basam ti umthei ahi. America gam achun nu khat hin chapa sagi ahing ah achate chu alen pen apat in khat khat in china gam ah missionary nasep na akal suan nau ah khat athi le khat aki pan kit jel ah hi ti chun khat khat in ahung thi gam tau ah aneu pen tiang in chanchinpha gen in Missionary nasep na ah a hinkhua ala chan gam ta aneu pen pa ahung thi phat achun jia minu chu ahung kap ta min a ute athi abawn kaplo bang ding ah aneu pen pa thi chung ahin kap la hem tin adawng ua numeinu chun hitin adawnhu ah a uteho a thi jou in le Pathian thu tangkopi thei chapa kanei in tun chanchinpha he lo te kiang ah chanchinpha va gen ding cha pa ka nei tak lo jia in kap ka hi atia. Halleluia! lopina Pathen chang ta hen la. Ngai tua tiam hitiu jia minu chu bang ti gual minu ahi ta diam acha te bang ti gual in gamthim veinat na anei thei na ding uajil til na anei ah bangtin ahil ahi ta diam maw ?

Missionary nasep na hi masawn hen I tiu ahi le nu leh pa ten nasa tak ah pan ilak masat ua Khrista sepai hangsan ding in nu leh pa ten icha teu hi Missionary huang ah i pui lut diu apawi maw ma ma chu ahi. Korea gam ah khang thak te chun gamthim lainat na anei jia ua Missionary na sep na ding tin sum le pai athaw un athaw diu anei lo phat uleh athisan uh juak in Missionary ah athot dok sek uh ahi. Min jia ti gual khop a gamthim ading in nasep anei thei na ding ua acha teu bang tin ajil til ah en bang tin ijil til uh ahi diam ngaitua kham set ahi maw ?Jia jia chun nu leh pa te haw icha teu Missionary huang a puilut thei ta ding in i insung i kouchuam sung leh i mission sung lalpan hun maljawl ta hen.

KUM 1964 HUN LAIA LANGMAICHING KHUA **THAGAU NESEPNA**

By Upa S.T Gencha Vaiphei Nghathal

Langmaiching khua Senapati Dist kiti Tuhun in Kangpokpi Dist kita mun ahin KALVARY ZAWNA SUANGPHUTHU HUNG TUN DAN. 10th May 1964 Pathianni zan Biakin kikhopna i Lalpa Jesu Kristan kahinna kapi ai tin athina chanchin (L) Upa Lamkhokai ahun thaw sak hi L.M.C khua Revival na thagauchang masa pen Nk. Neizochong leh Chinneikim ahia. Zia hun lai taka chun Pathian thagau thiangtho thuamin Nk. Neizachong @ Chongpi Langmaiching. Kammang in Pathian thagau thiangtho thu ahung tungin KALVARI JAWNA Suangphu ding thu ahung puang hi.

Sadar Hill Ngungal gam Leilon gam mun dang dang ah um Thimlal thuneina khatvei jaw ahi tan ti hiat jingna dingin KALVARY JAWNA Suang la phu ding uh ahi tin Thagauin ahung puangsak tai. Zia Kalvary jawna suang phu hun ding leh asuang hawl ding dan hi Nk. Neijachong @ Chongpi chu Thagaua limna chang pumin Ni 7 (Sagi) An ngawlin aum hi. Zia hun lai a chun apa (L) Upa Heljakhup in tui bek don dingin ala themsek in apan ahepi ma ma ziakin ama chu Pathian Thagauin apha lo ziakin ala nuam ngai puai. Nelo dawnloin sun leh lo kuanin nasemin a kuan sek hi. Nitak dak 6 vela Biakin kikhawpna a pang zel sek hi. Ama chu Pathian thagau thiangtho mapuina jalin taksa chauna leh hatlo na te bangma a nei diak puai. BiakIn zan sin kikhawpna thagau nasep pumin apangin zingkal nitak in Bu a sun, a zaw phat leh suna lo kuan zel sek ahi. Ni 7 (sagi) ahung tin phatin zia JAWNA SUANG phuding dan leh asuang hawl ding thu ahung puang kit tai. A suang ahi leh Langmaiching khaw gal lam a chun, lui khat (guam) a umin zia chu (Nungphura) guamlui Meitei ten ala kisek nau achun chia unla zia mun a guam gei achun .Tudal kengin cho leu chun

asuang ala um di ahi. A dung feet 6½ a sang avai feet 1½ ala um ina tin a hung puang hi.

Zia mun a chun Upate 1) Upa Soikhothang 2) Upa Mangtinkhup 3) Tirko Siaktinhau 4) Teacher Khamtinthang 5) (L) Upa Heljakhup. Tangvalte :- Tv. Jamkholun leh aloite achia va. A suang chu tudal panin Nk. Neizachong (Chongpi) thagauin apuan sakna mun chuh ava et uh leh, ala puan gual gualin suang chuh ala um hi. A dung avai ati gual chet in ala umhi, a phu ding ni ahi leh 16th May 1964 Kiginni Dak 3:00 PM chet ah la phu ding uh ahi. Athu suang chung a kizik dingdan ahi leh Halleluiah Pa leh Chapa leh Thagauthiangtho chu pakin um taken Amen. Zia Langmaiching khua Kalvary zawna lopitak umhi zion la tunni tiang ua la hiat zingna ding ua suang phu chu ahi tai. Kuale zia suanga kupal tapo chu a hal hal in lengin na ti zik ahi. HALLELUIAH AMEN Rom 9:33.

Suang agei kim velin JAWNA JAWNA tin aki zia hi. A suang zik ahi leh Teacher Khamtinthang Upa Lamkhokai Tv. Zamkholun tuhun ah Upa S.T Gencha Nghathal a um alawite ahiu. Zia Suang phu ding ziaka chun kochuam ten programme siamin date 15th May 1964 simhaini hi suangphu na ni dingin programme ahung hawmtau hi. Ziahun lai ahin Langmaiching Village hi tuhun ah Presbyterian Church (K.S.P) ala um a hui. Zia suangphu hun lai ahin Tirko Siaktinhau (Hauva) la ala phuak hi, a la ahi leh:- I Korinth 15:55. 1.

1. Lalpa'n gal a zo tai Kalvary ah
 A gal zawna kiko aw hawitak chu
 Hepa hepa bang dinga lei nusia em ti'n

Khawpi hoi zuana zaw na i chang tau
 Gal zawna Lal lukhuk hawi Jesu'n
 Ei piak ding ni a nai ta e

2. Lalp'n gal a zo tai Gehen gal lian
Halleluiah Amen pak hitiu ve
Zawna tumbak leh puan lap Dawm sang un.

3. Lalp'n gal a zo tai Halleluiah
Pak hi tiu Kalvary lam mual jawla
Lam min a zawna zawi zawi sam hi tiu.

Zia la hi JAWNA SUANG PHU HUN a hin kisa mun pen ahi. Kalvary jawna suang phu hun ahin Pathian thagau nasepna tangpi chu zia jawna suang chu Pathian Thagau thiangtho thupuk dungjui in zia jawna suang chu kua man va mawk sukkhak thei lona dingin zikkual (Protect line) siam in Pathian thagau in amat chakte duty bawlin mipite a din kual sakin kuale nekthian lo nete, Zu leh sa nete, chep leh muam chingte lut ding a phal puau hi.

Zia hunlai taka Pathian Thagau thiangtho in a mat chak te laka mapuite chu.. 1) Famta Nu Nemzaniang w/o Pastor Soikhothang. 2) Famta Nu Chawngkholing w/o Upa Mantinkhup 3) (L) Upa Lamkhokai 4) Nk. Neizachong @ Congpi 5) Nk. Chinneikim w/o Pastor (L) Thangneikhup, 6) Nu (L) Lamkhoting te a hui. Suang phu huna Pathian chawihawina la kisa mun pen chu:- Kalvary jawna lopi chu Angel te'n a chawihawizing ui LTT No. 231 4th Edt.. Suang chu vel sagi (7) aki velin Halleluiah sagi (7) vei sam in kitiamna Thagau thiangtho in a nei sak hi. Kitiamna anei sak thu ahi leh Kalvary jawna suang kiphu taknung a hi'n. 1) Nek thianlo 2) Kithawi kimut 3) Ju leh sa 4) Suammang leh gukchak 5) Huk leh thanhuai 6) Kihek leh kinak 7) Chep leh muam. Zia gama chun nungkit tapo chu a halin leng inna tin sia samin Thagau Thiangtho in kitiamna mipite anei sak hi. Zia kitiamna mipite neisak chu (L) Upa Lamkhokai Thagau Thiangtho matchak in anei sak hi. A nei jaw phatin Upa Soikhothang in Pathian kiangah latna anei in a jaw phat in suang chu phu ahi tai. 6:00 pm in taksa ankuang upkhawm na nei ahiu khatvei hun tawpna nei ahi tai.

Nitak dak 7:00 pm min BiakIn kikhawpna ka neikit tau a, thagau nasepna ahung kipan kit tai. Nungak lam po po aki chop thaw kit a, pawsal lam po po chu atai kual thaw kit ua numei leh pawsal chu akikalhel umlo hial in a bung bung chan hung kikhen a, a kal ah chun Kochuam Upate ading tan ua Hallehluiah ti hi kilang khiak in ka sau a, khuang tangval ten kituak takin akhen ua, la ka sau a puak jung jungin kisa jiang ahi. Zia gual a kichawp leh taikhawm a Hallehluiah la sak tawh thua a khuang tawh kituak taka kuama aki sukha le umlo hialin umthei hi taksa thiamna zil di hita leh dangka Rs 10000/- (Singkhat) bek ki mangzo dingin ginchak aum hi. Zia nungak tangval nupi Upa Kochuam Upate leh member te zosia, Pathian thagau apat limna nei zo sia malsawmna chang zosia abung bung cha kikhen in, chawihawina, chawpna a um in Zion lapi lemin kituak takin lasa pumin tulai ah lam kual lam ati gual un thagau ah limna nei zosian zion la sa pumin Meitei te thabanchuang gualin chawm in nuam tak maiin Pathian Thagau chang pumin lam leh la sak a nei ui. A la ahi leh thagau lam pau in (Handes) tin kilang khiakin la a sau a hun tawp ahi tai. Hun leh kumte chia zelin zia Kalvary jawna suang chung chang hi ahung kilang kitin. 2009 zan khat hi Nk. Neizachong (Chongpi) tuhun a Nghathal P/C (K.S.P) ah um kianga hin amangin zia Kalvary jawna Langmaiching khua kiphu suang hi ala pukin a khup lama Andro lam ngan a pukin kuama a phong ding di a enkawl ding um talo in a umden tai, ti thu hi amang lamin ahung kigen kitin. A mang chuh banggual hung tung ding ahi em ti thil zing laiin kum 2010 nia kipat hin khua leh kochuam ahung chavai, kikhen zakin. Tichun, kum 2010 apat 2011 chan ahin a khua leh a kochuam ahin, kuama a cheng leh aum di mi mu ahi ta puai. Ziahun laia kochuam Upa leh Member te thina thanmual in ala liam gam tau hi. Tuhun ahin Nu Neizachong in amang lama al mu gualin Langmaiching khua thagau thiangtho apat Kalvary jawna suang ala mu kochuam te'n thagau thiangtho hiatsak guala aphu chuh a enkawl ding um ta loin asuang ngon aki tungin achung ah kizik te le simthei hi talo in ama ngawn aki tung den tai.

Kum 1965 date 13/03/1965 hunlai ahi, Langmaiching khua Thagau Thiangtho in daiah cross apfu sak thu. Pathian Thagau Thiangtho in Member Pa (L) Lutkhokam kiangin dai muna cross phu ding thu ahun genah Thagau hiatsak gualin date 15/04/1965 simhaini nitak lam dak 2:00 pm leh laphu diu ahin. Cross thing di chu Tawng 12 sau di ah'n avai lam chu Khap 12 sau di hin tin, asa lam chu inch 3 sa di ahin a pek chu inch 12 hiding ahin, athu chu zia gual hidi ahi. Date 12.03.1965 Halleluiah 1, 2, 3, 4, 5, 6, Kalvary mulo te muna zawna cross helo te hiatna Damlo te damna kahi. Luka 23:44 kituak lo te kituakna abul leh a tawp ka hi ti hih. Thagau hiatsak gualin date 16.04.1965 Good Friday simhaini nitak lam dak 2:00 pm in ka phu tau a. Luka 23:44 Upa Soikhothang in a sim a. La "Gitlo thiannan Jesu kianga lachia em" ti la kisan mipi ten pauchap gualna neiin hun suktawp ahi tai. Cross hi 4vei lam phu thak ahi:

- 1) Date 29/03/1991 ST. Gencha apat phu thak ahin.
- 2) Date 2/10/1994 Hausanu Hoitinchong apat phu thak ahi.
- 3) Date 28/03/1997 Revivalish Khuptong apat phu kit ahi.
- 4) Date 7/05/2004 LRYF te apat phu thak kit ahi.
- 5) Date 10/04/2009 Mrs. Thiamnu apat phu thak kit ahi

Kum 1994 a Hausanu Hawitinchong apat thu kibelap Kua le Thagau Thiangtho changa na semte zosia zia hinna kung hi taksanglo chu a dam sung hina haksa ding ahi.

Kum leh tha hung chia zelin Kum 2009 ahin Nu Hoineithiam dai mun a pauchap dinga a vachia leh cross kha ala puk a niksate leh lungkhaw te'n ane se tau a, ama le a lungthim in a pauchap lai in thu ahung kigen kit in cross hin eisiam pha kit un tin a lungthim in thu a hung kigen kit in, Upate Local member te meetting neiin, zia cross pen hi siamthak kit a hi. A thing chuh Kal thing mugil leikha ten le anek siat thei lo uh, thing phu leh siamthak kit ahi tan, Nungak tangval Pathian Thagau

Thiangtho nasepna cross phung a chun nitak sin leh dai pauchapna neiin Pathian Thagau nasepna a um zing hi.

Date 24/9/94 kum a hin zan BiakIn kikhawpna 7:00 pm ST. Gencha Vaiphei Thagau Thiangtho nasepna tangpi vak gen kit hi tiu. Thagau nasepna kikhop nuam tak mai a hung um in Thagauin hung mangchan ST. Gencha, kiangah hiatsakna a hung tungin zia chu a hi le... Kona pengkul gidi ei tai pulpit a, a mai a kochuamte zosia khupdin ki latna nei di ahung tunga gitlo a kihel ten gitlo haisan ding ahi ti thu. Upa Th. Lalcha tangsap sakin pulpit chung a tang sapna a nei hi. Thagau nasep taksang lo mi a umin kaidaw zing ding ti thu aum in mihing i hi zia un bawl lo ding ahi tin thu ahungpuang kit hi.

25/9/94 zan kikhawp ma ma in BiakIn kikhawp na a umkit in zia chu Nu Lamkhoting kam mangin Thagau in thu a gensak kit in a thu gente:- Thagau thupuan leh thugente hi i taksan lo uh ahi le khosung ahin buaina hung tung ding ahi ti thu ahung gen tai. Hun chawmkhat a kumkit nungin buaina thupi tak kitha kimat natiang a hung tungin buai a um ma ma ziang hi. Thagau thupuan gui tunna ahi tai tih ama Nu Lamkhoting man a puang kit hi. Kona pengkul hung gi leh banggual in la um diam ti dawtna, mi Kochuamte piting ngon mi 47 lam ahin adon hunau a chuamchiat ahi. Khenkhat in kona pengkul hung gi leh kisa zo san um ing ka ti loi, khenkhat in gitlo ngaidamna don ka tin hakdam ka hi thei nadingin, khenkhat in kona pengkul chuh a hung git phat leh he ngei dingin kiging jing di ka hi. Khenkhat in kona pengkul hiatthei nadingin a kiangah thupha bawl ding ka hi. A dangle tampi aum a genseng di a hi puai. Zia zawin hun suk tawp ahi tai.

26/09/94 Zingkal Pathianni khat kikhawp na mi ahi kitin:- Upa ST. Gencha Thagau nasepna a nei kit in nungak naupang pani (1) Chinlemmoi (2) Lingneichong ama ni mangin pakhat a chang lama apaia pakhat a vei lama apaia. pulpit vel 7 a velpi in chawihawi na chom

pumin a dak bi tiang chet chet in chawihawi na achawppi sek hi. Chuleh Pulpit mai diallap chia zing hi tiu zion chate ti diallap akung a khan zik kualin khamthei chep leh muam nete zia aki zik kual sunga hin lutsa loin, a ningli nungak chapang pani leh nupi pani ading kual sakin Thagau nasepna thupi tak tak aum sek hi.

A zingkit in Revival kikhawp na a um kitin. Chia zing hitiu zion chate ti diallap kha numei naupang Lingneichong leh Chinlemmoi pakhat gel a, atuk sak adawp sakin ama, tichu ST. Gencha alai pangin Thagau nasepna a ki pan sek hi. Zia mawla diallap kunga a zik kualna asung lama chun khamthei zu leh sa ne chep leh muam bawlte lut theilo ding tiin. Diallap kung chu abul kikim cheta tan ahia pasalte chutna line achun lut thei lo ding ti etsak nan lei chak Biakin sung a chun ahek lutin Feet 1½ leitual tak ma ma a chun sun lutin aum hi. Ziate mihiam tha sut lut ding a chun ginchak umlo hial ahi. Tangval hatlai ten le sun tun zo lo dinga ginchak ahi.

Date 30/10/94 Kum a hin Langmaiching bial Dist. Khawmpi na La kidemna lawman kila lawpna khat a umin Pa Lamkholet (Letpu) lawpna a nei in. Zia lawman lawpni chuh Pathian ni ahin. Zingkal Biak In kikhawpna, tu tu ah Nghathal P/C um Upa ST. Gencha Thagau Thiangtho in a mangcha (JAWNA) suang phung apat chun kilik sukin Langmaiching hi mun zang um bek lo ahin Farlong 1 vela gamla ahi, lawman lawmte Pa Letpu In tiang kilik sukin zia hunlai a chun Langmaiching Bial Chairman chu Upa Zamkhosen a hin. Lawman lawpna vawk khat athau ah'n vawk thisan chuh akhut a chawiin Upa Zamsen mai a nu piak in. Thagau lim pummin tukhel Pathian ni gan thalo di thisan sualo ding tin apuang hi. Mihiam lunggel achun, lungnat thei in um ahin, a hinla thagau in mihingte manga nasepna ahi ziakin Upa Zamkhosen Kamutampak chunle tukhel Pathian ni thisan sua loding gan thangailo ahi Thagauin a phal lo ahi tin kipak tak mai in mihing lunggela Pathianni thisan sua ala hisek pen hi bawlllo ding ahi tai tin Bial mipite kiangin a gen in khawtin na apuangvel tai.

PHAILENGZANG KHUA MARA SUANG PHU THU

Date 10/07/64 Niin Biakin kikhawpna aum in Thagau Thiangtho apat hiatsakna Upa Lamkhokai apat thu ahung pawt a Upa ST. Gencha Thagauin ahung mangcha Jesu cross chungu kikhai kang thu athaw saka. Dak kal 2½ aban a jak sakin akhawsa vatha jut jut in nupi Upa Thagau nasem ah lim zosia chuh mithi ka gualin a kapchiat tau hi Lalpa Thagau hiatsak gualin thilmak a tun zaw phatin Lalpa Thagau Thiangtho hiat sak dungzui in Phailengjang khua hin suang laphu diu ahi tin. A ziak ahileh..., Kum tamtak lapi lapu in gukchakna munate ju leh sa nekna mun ate huk leh thanghuai na ate thingbul suangbul ho na mun ate Bawng leh Lawi philna mun ate tuni tiang ahin hechian nailo in Mara mun lachan sak tau a. Tuhin ka hepina thisan ziakin Mara (Thilkha) mun chu suk thumin a hung um tai, ti hiat zing nan suang chu laphu diu ahi tin Thagau in Upa ST. Gencha tuhuna Nghathal P/C aum hi apuan sak tai. Thagau thiangtho hetsak gualin date 18/07/64 kiginni nitak lam dak 3 in Upa Soikhothangin latna a neiin “Jesu hepina leh phatna” ti la ka saua suang chuh nitak lam dak 3 in phu ahi tai.

Zia hun ahin Thagau lam gualsiak aum hi kichawp tekna gualsiaka pangte (1) Pa Zamneipau, (2) Upa ST. Gencha, Nk Lamtinkim, Pu Nektinpau, hiatthei dingin Pastor Thangneikhup Pa ahi a dang dangte het senlo aum hi. Taksa ankuangle umkhom ahin nitak dak 7 vela BiakIn kikhawpna a umkit in a nuam ma ma jiang hi.

A SUANG A THU KI ZIK

Halleluiah Mara mun Pa leh Chapa leh Thagau thiangtho chuh pakin um taken Amen. Zia Phailengjang thina thim nuai a chute a tui kuaman a dawn thei taklo nung chu Pathian hepina, thisen zalin dawn thei ahung hi tak ziakin zia hi hiat zingna suangphu chu ahitai. Halehluiah Amen. Luka 1:17 Phailengjang Hausapu Soikhotinpau in kochuam mun tina Thagau suangphu thu la a phuak ala chawina. I Korinth 1:18
– 19

1. Christa thagau changa nesemtu zosia
Hepina hi thil piak chungnung ahi
Thagau diktak a tun phat leh thudik zosia
Lung mawl chate hung kai tho kit in Lalpa,

Lalpa ka sepna ngaijing in
Thagau limna ka chan teu hi
Kumtuang khawpi eipui lutin
Thiamgau Joel thugen gualin
Agui tunna ding ahi jawi.
2. Thagau thupiak lathil nei kithuam in
Lathik tiang leh thagau puan leh sakhau
Lalpa Christan khawvel a et sakna ah
Ei kopa a thiantho gualin thiang hi tiu
3. Korinth thawt khat bungin agen gualin
Lukhuk khuk ding pau hiatlo le aum
Kochuam muntin thagau suangphu zion chate
Hallehluiah tin pakin umjing ta hen
4. Kross thu chu mangthaite din ngawlna
Hukdam chate dingin thil hi theina
Mipil pilna chu himangthaiing ka tin
Lungthim thiamte thiamna pai thang ka tin.

Zia la phuak pa Hausa pu hi tu leh tu hi'n kum 90 val ahi tan adam
nalai hi. 1964 hunlai a Phailengjang khopi kiti sek Vaiphei pakhai khua
Bethel suangphu chanchin date 29/03/64 Vaiphei pakhai khua zan
Biak In kikhopna aum in Pu Ngulkhogin mangchan Thagau thiangtho
in thu a gensak hi. A thugen te chu, Lamit mu ngei un Thagau nasep
thilmak ka bawl hi lamu tau a ka taksang hi latiu a, a tia nuizatna mai
leh etnawp mai hakvana mai ahi leh tukipat in pawt dok mai un nang

uh a dingin phat chuampi sangin lakipal nau leh lathi nau hung hi zawнна tunung tak leh mi lian mi lal ten le hung taksang puan nau. Chingthei in kiveng un chomcha sunga vaihomna hung umdi a hia. Chun, chunglam abana chanchinpha malsawmna ga eilawsak hi atia.

Date 31/3/64 zan hun ah Biak In kikhawpna aum kitin Thagau nasepna ahung kipan kit hi Kristan Rapture ah, ami thiangtho te ahung puidaw di dan ziagual hi di ahi tin, ahun thawsaka mite chungah akhut avak ngak ahi le mite chu Thagauin hung thuam in aum ngal mai uh ahi. A nunglam ah chanchinpha ga a tusak kha Bulem haw umdan a thawsak hi, a lakkhawm dan a thawsak kitin alem te khendan didan a thawsak kit hi. A lem leh atak te achawk hel kit in khawvel hi phatkhat hun khat leh zia gual hi chawhe la hung umdi ahi, tin ahung puang hi. La “Zan lungngai um zion pindan sunga” ti la aki san a nuam mama jiang hi. Hun chawmkhat jawin thilmak ka bawl hi, a taksanglo mi 30/40 val aum ui Setan nasep ahi la ti ziak un tulai mipil a kingai te I.A.M.A ka hi ati ziak un Thagau thugen taksanglo te hi mi ngawl hung chang di a hiu. Mingol ah angai uh cross thu suangte hi mipil hung chang di ahiu. Amasa, nunung ding a nunung masa ding tigual hung hi ding ahi. Tule Pastor Liankhopau ama khut mangin Thagau (Tui) Ngungal gamin a tha lut sak a. Tun aman gamhuai nasep ahi tin a taisan zia kin, a tunphei nung ni 10 (sawm) tinni leh a chungchang vaihawmna umdi ahi tin ahung puang ahi.

Date 1/4/64 zingkal kikhawpna aumin Lal leh Hotuten ahiat thiam lo ziak un zia thu hi ahungpawt hi, zia chu ahi leh ka tepte tai Lal zo puan lau, kei lei hiatmil tak ziak un mangthai tan latin a hung ziak tai. La mangthai lona dingun thilmak kazik piak la hi tau, tin nungak naupang Lamtinkim (Kimvawm) mangin Thagau thiangtho in a hung puan sak hi. Chuleh, patek nidanglai a khua Thiampu ala pang Pu Nektinpaу Pastor Thangneikhup pa ah Thagauin ahung mangcha lampi pani thu ahung thaw saka zia lampi umdan chu ahi leh. 1) Kumtuang gam 2) Gawtmun etsak na ahi. Zia phat chun numawl pamawl khen khat in

kithawi kimut, a ngawng ua asa aw teu sutthan pian thakna gingtu hina neiin Hukdamna amu khawlaw tau ahi.

PHAILENGZANG KHAWPI VAIPHEI PAKHAI BETHEL SUANG PHU THU

Thagau thiangtho zia khua hi Phailengjang gama ka mite tawh kimutua na dingah bawk ka khaw sakna pen ka mai kangat masak penna ahi ziaikin Bethel mun ka hung sak tai. Zia hiatjing na dingin suang la phu ding uh ahi. Lalpa Thagau thiangtho hiatsak gualin date 22/8/64 kiginni chun nitak lam dak 3 in Upa Soikhothang in latna a neiin phu ahi tai. La khat ka sau a mipi kilatna ka nei uleh Thagau nasepna auma, kengtawdap te ahung pai mang a, dum chepte a sakhau ua dumjialte a pai mang piak ua ahung sukthian zaw phat un suang chu ahung vel ua Upa 12 Dum khu cheplo chiat ahung tel dawk ua Thagau nasep 12 tel dawte chu sawlchak 12 te etsakna ahi tin ahung puang tai. Sawlchak 12 te chu bangna sem ahiu em ti dawtna aumin dawnhuna aum zaw phat un, kilatna, halote panpina aum hi. Sawlchak 12 te etsakna atel te chuh ahi leh 1)Upa Lamkhokai Langmaiching 2) Upa Zamkham Phailengjang 3) Pu Ngulgin Chaktang 4) Pa Zamneipau Elimphai 5) Pa Henkhozang Salampatong 6) (L) Khupnei Phavaibi 7) Lalvom Lairuak 8) Upa Awtneipau Mualcham 9) Liankhonek Gotangkot 10) Lettinsoi Haukuangphai 11) Upa ST. Gencha Nghathal Kanaan Veng 12) Upa Singkhai B. Tuallian te sia hi a hui.

Date 23/8/64 Pathianni zan kikhawpna umin kikhawpna masangin 12 telte kha kilatna a nei un amasa pen in kilatna a nei phat un Thagau thiangtho in ala dim chiat tau in mipi te kha mawk lut ziang di a phal puauvin amau sia chu kawtbul apat pulpit mun tiang ala kitiang un pakhat khatin ei thalut un thudawt a nei ua kawt bula dingpa chun thisan man ba ka hi ti laki he nam, ka ki henai ati leh a thalut un apau lo ahi leh a nungsawl kit un suang phunga kilan dingin a sawlkit sek hi. I lut thengkit leh lakhut leh Pathian khawizaw a najaw em ti ala

dawng kit in a luttheng kitin pulpit phunga mi khat ala ding kitin ama chun mihing lungthim et chianna Durbin ala chawi kitin mihing lungthim zosia leh ngaituana leh dinmun zosia kichian takin ahung gen dawsak ziang sek hi mi tamtak chu aum dan gen daw di lauin Inlam kile kit nungchia kit a um ui. Thudawtna anei sung chuh dakkal 3 a lut hi. Zia pulpit maia Durbin chawi pa hi tu tua um Upa St. Gencha Vaiphei Nghathal Kanaan Veng (KSP) um hi ahi. Thagau in Bible chang dawtna a nei jawin huntawp ahi tai.

Zia thu kizik te hi Pastor Soikhothang ala zikna kilasawn le um ahi'n genkhial um ngei dinga kaging cha. A um khak leh simtu zosia ahungpai tading Lal Jesu min in ngaidam.

KHANGLAITE ZANGAINA CAMP REPORT
CHAWMKIM

By: Editor ZT

A chiata Tarik 16-19, June, 2022 sungah khan pawl chuam chuam kigawm ah Khanglaite zangaina camp chu matzaw ala hitan ahi, zia khanglai camp a ding ahin pan akilak zinglai in Pa tawm ngai tak tak leh Nu tawm ngai tak takte kiphalna leh kitiamna te zal in bangkim tasam keilo in lopi tak leh lawk tak in matzaw ahithez zia inle Pathian kiangin kipak thu igen uh ahi. Zia camp a hin RCG pawl apat in khanglai 53 ahung pangthez un kipak um hi. Chun camper aki gawm in mi 191 ahin, committee member leh speakerte pum in mi 220 vel hi akipang khawm zing in ahi. Camp Speaker te ahiu le, 1. Evan. Lienthom leh 2. Evan Lunminthang ahiu in, Camp Director Rev.L.Khupboi Vaiphei leh Asst. Rev.Dr.Khupkam Vaiphei chuleh Committee member mi 12 aki hin ahi. Camp sungin ka taksa damlona jia kin nikhat le kilang zo lo

in um maleng Pathian zal in fel tak leh bukim tak in camp akimat zaw thei ziakin le Camp Committee member zosia te chung in kipak thu avel in kahun gen kit ahi. Ziagual ahin Pathian lemkuat in Hunnungung Khanglaite Zangaina Camp chu ki ngaina kawm le ki thalel tak in mat zaw ahi ti thu le ka het ziaik in lopi ka sa diak in ahi. Lalpa'n camper leh committee member te zosia taksa leh thagau in ale tam tak in hun malsawm chiat ta hen. Kakipak hi. Camp group lim khenkhat cover page ah kawi ahi.

(Lim cover page ah muthei hina)

HILLTOWN RCG KOCHUAM IN VBS KIMATNA

Date: 1st-2nd, July, 2022 hunsung a khan RCG Hilltown Kochuam in naupanglam te VBS (Vocational Bible School) class nini sung anei piu in, kipak umtak in naupang Beginner, Primary leh Juniour kigawm in naupang 20+ vel in kiziltilna class chu nei ala hi. Ziana ah hotu te ahieu le, Nu Lawmkim BRE of Vanghoiphai leh Nk Kimzina B.Th 2yr of Hilltown ah um ten kitup tak leh feltakin ziltilna alanei un lungdam a um in kipak a um ma ma hi. Naupangte annekpina le anei un limtakin date 3rd-July-2022 Pathianni in closing ceremony cum Children day taw mangkawp in VBS chu kilawm tak in khakna chu siam ahin ahi.

(Lim cover page ah muthei hina)

REVIVAL YOUTH FELLOWSHIP SOLFA TRAINING

A chiat Tarik 25th-28th, July,2022 sunga khan Revival Youth Fellowship (RYF) te saina nuai ah Solfa Training chu Gawtangkawt khuan neizaw ahita ahi. Khanglai chiakhawm te (1). Mualkonbung apat mi - 7.

(2).S.Kanan Khua apat mi - 7. (3). Bewlahland apat mi - 2. (4). Hilltown apat mi – 1. (5). Kangvai apat mi – 1. (6). Gawtangkawt apat mi – 8. Total mi- 26 ahiu in, kipak umtak in bangma buaina umlo in Solfa training chu Tv. Dadam of Kangvai Instructor hina nuai lawting tak in matzaw ahita ahi.

(Lim cover page ah muthei hina)

PAUCHAPNA HETDINGTE

1. Kochuam tin ah Revival thagau ah limna leh halthakna ahung tun thak kitna dingin.
2. Gamthim salvakdingah missionary na isepnau te chawlo ah malam kinepna neizing kawm ah ahat zaw diak ah pan ilak thak zel theine dingin.
3. Ahung tung Tarik 19th-August-2022 ni le RCG General standing Imphal branch office mun ah zing lam dak 8:00 apat nitak dak 3:00pm kikal hun sung in neiding ti ahi gual in buaina umlo ah meeting mat ahitheina ding in.
4. Pawlsungah thagau gam suhatthei ding Revivalpu ding pa fel leh gin um imu vak thei na dingin.
5. Kochuam sunga nungak tangval ten private hi henlang government ah hita le sepna ahun mu zel thei na dingin.
6. Theological college ah simlai inei sun sun ten tawm ngai ah ahun zil zaw theina dingin
7. Lobawl miten akinepnau gual ah kumtun thatun le Bu tampi pi ahun muthei na dingin
8. CEC te thupukna gual in tukum Nupa'n seminar/couple seminar nei dingah thupukna akinei gual in buaina umlo ah nei ahi thei ngei na dingin.

9. Pro/Pastor M.Oken damlo ah ki enkawl zing ahi ziakin ahung dam vak thei na dingin.
10. T.Loklaiphai ah church building committee te thulemsakna gual ah October tha le Biakin sakpat ahithe i na dingin

H E T S A K N A

Mimal kua tawbang Kochuam sungah sawm ah khat piatheilo, chuleh Zion Thusuak lakman hun pia nuam ten anuai ah RCG Bank account number leh Bank min chuleh IFSC number kipia a hin hun thawt thei inlau ti in ka hun hetsak ui. Editor Zion Thusuak Board.

- ❖ Account Name : Revival Church of God
- ❖ Account Number : 11343704608
- ❖ Bank Name : State Bank of India
- ❖ Bank Branch : Churachandpur main branch
- ❖ IFSC : SBIN0006182
- ❖ Branch code : 6182
- ❖ MICR Code : 795002504

ZION THUSUAK PATRON MEMBER TE

- 1) Pu Thangboi, Kamdouveng
 - 2) Nu Niangneu, HQ Veng
 - 3) Nu Lily, T.Munjang
 - 4) Nu Samboi Vanghoiphai
 - 5) Pu GL Muana Neitham, Gochinkhup veng
 - 6) Upa K.Kama HQ veng
- ❖ Patron members kum 3 (thum) 2020 apat Rs 1,000/- hita ahi.
 - ❖ Life member dingin 5000/- ahi. -Editor, Zion Thusuak Board

NOTE: Zion thusuak Annual Subscription fee **January** apat **June** 2022 sung tiangah hun plate amin uh ka hun taklang in, chuleh alengua chungin Zion Thusuak board ten kipak thu ka hun gen uh ahi.

1. Nu Nguljaching Tuibuang	-	Rs. 500/-
2. Upa K.Kama Hq veng	-	Rs. 1100/-
3. Rev.Pauneu	-	Rs. 100/-
4. Upa Khaitingen salem veng	-	Rs. 200/-
5. Upa Soikam Gawtangkawt	-	Rs. 200/-
6. Nu Kikim Hq veng	-	Rs. 100/-
7. Upa Jangthang Kamdouveng	-	Rs. 100/-
8. Pa S.Hauptu Leimakhong	-	Rs. 100/-
9. Pro/Pastor Lianboi	-	Rs. 100/-
10. Upa Lalla L.Vaiphei veng	-	Rs. 200/-
Total		Rs.2,700/-

Collector/Magazine Agent:

1) Tv. Douminlun	Hilltown
2) Tv. Lalroman	T. Munjang
3) Pa Paelim	Kangvai
4) Upa Tongjang	Imphal
5) Upa Khailiankham	Nakhujang
6) Upa Manglun	S Elimphai
7) Upa Liankhai	S Kanan
8) Pa Mangminlun	Gawangkawt
9) Pa Khamneu	Jordanphai
10) Tv. Hauginlian	Bewlahland
11) Upa Mamang	Mualkon
12) Pa Ts Boipu	Mantripukhri
13) Pa Lenghau	Phaltual Vanghoiphai
14) Pro Pastor	Lianboi P. Gamhawi
15) Upa Lalla	L. Vaiphei Veng



Khaglai
Zangaina
camp
Gileat
Tlang



Hilltown
VBS
Naupang
te leh
Houtu te



Centre
RYF te
Solfa
Camp,
Gawtang
awt



Khanglai te Zangaina Camp Committee member te

BOOK POST

RNI Read. No. 34293/80

To,

.....

.....

Stamp

If undelivered please return to:

The Editor
ZION THUSUAK
RCG Head Office
Thangzam Road, Hilltown, Churachandpur, Manipur
PIN – 795128, P.O. Box No. 91
Email: rcgmission@gmail.com
Website: revivalchurchofgod.org
Contact: +91 9612652209 (Exe. Secy.)